

# La mwêje fame.

Les Echos de la Cité 27 Mars 1969. Gaston LUCY

I gn'avot in côp ène fame k'astot si mwêje, ku s' n' oume n' a savot conv'nu: i n' s' atindint nin assan.ne.

I plot dire cè k'i vlot, ile nu choûtot jamwès, mulète à djâbe, kwè !

Il ârot dit insi:

- Lûve-tu in pô, pou v'nu m' êdî ! Ç' astot assez pou la fwêre dumèrer ou lit la mitan du l'djoûrnée.

In djoû k'i rintrot après sa djoûrnée, i li d'mande insi:

- C'è k' t' ès fwêt anute ?

- Dès vêtes, dit-ile, et tu nn' ârès pon !

- Ni ti non pus, dit-i l'oume, et i fout l'cadô pa l'vite.

C'ére don tous les djoûs la minme comédie.

In djoû k'i nn'avot s' sô, il è rèchu et s'a n' è n'alé après l' bwès, à passant pa ène virée à l'abandon, k'on loumot « la Ville » ,pasku c'ére la place d'in vî viadje.

A kèrant dins les ronchisses après des meûrons et des fréjes, i tume su in gros gurzulî tout tchêrdjî. A s'a-n' aprotchant, là ki wèt d'avant lou in pwisse à lådje. Il tape ène pîre dudins et i wêt k'il ére fwârt fond. I s' mèt à tuzer à s'dijant :

- Poukwè z'esse si bièsse du passer ène tèle vîe dulé ène rougne parèye et z' à n' awè pou l'restant d' ses djoûs ! Dju vas wêtî d' m' à mète kite, à la f'jant tumer dins l'pwisse. !

Et, là-d'sus, il arva à l'mâjon et à tchmin, i s' dit :

- Pisku ni par bèle, ni par lêde, on n' sèt z'à rèchu, finichans z' à !

A rintrant, i dit à l'fame:

- Si tu vas âs fréjes û âs grosses gurzèles, nu vas jamwès à l'virée du d'avant l' bwès, sés-ce !

- Pis k'c'est insi, dju m'î vas du côp, pou t'fwêre aradjî, et du gros gurzulî k' t' ès vu, dju n'à lèrê pon.

Lou l' è sî sins brut, et tins k'ile kwèdot les gurzèles, i s'est avancî. Ile l'è oyu et à s'rutournant, ile lî djot:

- Nu vins nin, sés-ce, sâcré voleûr, û t'âres à fwêre à mi. Et à bawiyant, ile è r'culé dins l'pwisse.

Adon, l'oume est rintré ou viadje sins rin dîre à nolu.

Trwâs-kate djoûs après, i r'vint dlé l'pwisse avu ène grande cwâde k'i lêche duschinde dudins. Et i n'è nin sintu l'fond. Il è r'monté la cwâde et, à la ratchant, ile lî san.not bin pèsante. Arrivé à trwâs mètes du d'zeus, k'est-ce k'i wèt ? In djon.ne djâbe k'astot pindu à in neud. L'oume è yu bin peu, prêt' à lâtchî t't' afwêt, mès l'djâbe l'è d'vançi à brayant :

- Rèche-mu, va, brâve oume, rumonte-mu s' la tère, tu nu l' rugrètrès nin. Figure-tu k' là trwâs djoûs, dj'astins ou fond du pwisse à nous disputer et à nous bate assan.ne, coume toudis, kwè. Et vlà k'i nous z'arive yâk su l'cayô. C'ère ène mèchante fame k'è c'minçi à bwâler coume in vèchô k'on li è martchî s' la keue. Pîs, ile nous z'è hagnî, pinçi, mwârdu, batu, pité, si bin k'il è falu s'sâver èt pourtant, dj'astins in kâtron (26).

Et l'oume è atchî l' djâbe fu.

Çut'cî, arivé à l'coupète, dit à l'oume:

- Dju m'vas t' èspliker coumint k' dju vas t' pâyi et cè ki fâret k' tu fwêje pou gangnî bramint des sous sins mâ. Tu wès l' gros viadje lå-vâ.

- Ahy !, dju l' wès, les djins î sont tèlmint grigneus, k'on lès loume les « Hîrsons ».

- Eh bin!, ju vas î intrer et dju rindrê foles et malâdes toutes les fames du viadje. Dumwin à matin, tu n' âres k'à z'î v'nu, à t' dijant grand mèdcin, capâbe du guèri toutes les fames., tu maltoun'rès in pô dlé z'èles, et cand dju t' wêrê, dju sâtrê pa l'vite et iles sront rfwêtes.

Lu djâbe è don fwêt c' k' il avot dit et l' oume guèrichot à fwêt; on l'payot bin, on l' nourichot co mî et on lî d'not co souvint la doréye à rêchant du l'mâjon. Ça è dèré ène trwâjin.ne du mwès insi.

Pîs, in bê djoû, à l'brunète, lu djâbe s'è prèsanté à l'oume à lî djant :

- Choûte, dj' stime ku t'ès sté bin payî coume çà; dju m'vas aler tanter la coumére du sègneur, mès nu t' avizes nin d' î v'nu, û dju t'avale tout vikant.

Et co-ume d' èfèt, la coumère è tumé malåde, les mèdcins n' î wèyint rin, ile duvnot fole, on n' savot pus l' aprotchî, cand yink des domestikes è côzé d' l' oume ou sègneûr.

- Amon.nèz- mu l', dit-i à ses domestikes, û don bin, dju v' punirê tourtous.

L'oume à z'atindant l' djâbe, n'avot nin d'mandé s' rèsse et il avot filé p'âs bwès, mès les tchins du sègneur l'ont royu et les domestikes l'ont soumé d'guèri la coumère. - - Guèris-la û c'est ta fin !

Vlà nosse pôve oume dins ène drole du situwacion. Kwè fwêre ? Choûter l' djâbe û l' sègneur. ?

A z'aralant avu les domestikes, i s' dijot:

- Dju n'sus nin l'pus fwârt, i fât don ku dj' sûje lu pus malin !

Arivé dlé l' sègneûr, i lî dit coume ça:

-Rasan.nèz tous, les oumes du viadje ki s' êdat d' ène sucorie (fouet). K'is purdinjent tchèkin leu scorie et k'i toûrninjent lu viadje sins z'arèt, à fiant pèter leu scourie et à criant à pus fwârt:

- La mèchante fame è ruv'nûe, la mèchante fame è ruv'nûe.

Adon, il è intré dins la tchambe du l' coumère. Mès, l' djâbe î ère ossi. Cand ç' ti-ci è vu l'oume, il è duvnu aradjî, à d'jant:

Cè k' tu sâros bin fwêre don, incapâbe. Atins, dju vas t' duner ène luçon.

- Douç'mint, dit-i l'oume, dju vins t' avèrti k' la mèchante fame è ruv'nûe. Choûte cè k'on dit dins l'viadje et il è drovu la vite. Lu djâbe è pris peû.

- Eyusse ku dju m'catchros bin ?

- Rumousse ou pwisse, la mèchante fame n'î rirè nin, lîe, et tu s' rès trankile.

Et sitot l' djâbe vòye, la coumère è guèri.

Lu sègneûr è dovrû sa boûsse pou payî l'oume, mès la coumère, lîe, vlot marier s' mèd'cin.

- Non.nè, oh, Madmwazèle, dj'è ène fame ou payis èt dju m'arvas bin vite.

Et il è n'nalé.

Dupwis adon, pèrson.ne n'è pus jamwès atindu côzer du l'mwêje fame.

Du ç' ti lale, toudis !

Gaston LUCY

